

Erich Bolinius

Bericht über den BSV Kickers Emden

Sendung „Flutlicht“ auf Radio Ostfriesland

Donnerstag, 24.11.2011 18.00 Uhr auf 94.0 bzw. 87,7

Moin, leev Toehörers!

As ik lesd Saterdag mi nettakkraat up de Padd na d' Oostfreesland-Stadion mit mien Enkelin Sharina maken wull, kreg ik 'n Anröp van mi Jung Rolf ut Stadion. He see heel knapp:

„Bruukst neet komen, dat Spöl fällt ut!“ As 'n Blitz sloog de Naricht bi mi in un ik doch, nu hebben de Spölers doch noch streikt. Man as mien Jung wieder see, dat dat Spöl wegen Nebel van d' Schiri neet anfleit wurr, full mi 'n Steen van d' Hart.

Dorna hebb ik docht, dat dat gaar neet so leep was, harren doch de Kickersspölers de hele Week neet trainiert.

Man wat ik dann van Maandag of an in de oostfreeske Bladen (Zeitungen) over Kickers Emden lesen kunn, hett mi trurig aber ok wütend maakt. Ik fraag mi, well hett de Bladen de Unnerlagen, de heel un dall blot för de Präsidium sünd, toespölt? Dat mutt een wesen, de Kickers Emden een utwischen will, wall man hum villicht maal sehr doen hett, meen ik.

Wenn ik de Präsident west was, dann harr ik 'n Anzeige bi de Polizei maakt. Dat kann neet angahn, dat „vertrauliche“ Unnerlagen rutgeven worden um dormit de Vereen, de ja ok 'n „Wirtschaftsbetrieb“ mit Angestellten usw. is, toe skaden. Dat de Bladdjeschrievers dorover berichten, dat kann ik verstahn. Is ja hör Geskäft.

Wo dat vannabend nu up de Hövdversammeln in d' „Faldernpoort“ utgeiht, dorover kann man blot spekulieren. Ik finn dat in Rieg, dat de Upsichtsraadvorsitter **Klaus Strahmann** und Präsident **Günther Schmalzer** dortoe in de lesd beid Dagen nix mehr seggt hemmen.

Ik würr mi freien, wenn Kickers Emden ok in de Toekummst geven würr.

Man nu doch noch 'n bietje over Foetballspölen van Kickers Emden. De A-Jögdmannskupp is siet Sönnndag Tabellenföhrer in de Neddersassen-Landesliga. De Mannskupp van Trainer **Yasin Turan** wunn in Lünebürg (MTV Treuhand Lüneburg) mit 3:0, dör Toren van **Steffens**, **Flessner** und **Haubner**, un hett siet 10 (!) Spölen neet mehr verloren. Wall Langenhagen blot 1:0 tegen Verden wunn, hett Kickers nu mehr Toren skoten as Langenhagen. Ik graleer toe de Sieg un hoop, dat de Mannskupp ok in Toekummst för Kickers Emden uplopen kann.

In de Frauen-Foetball-Bezirksliga hett Kickers Emden tegen de Tabellenföhrer Auerk (SpVg. Aurich) mit 0:2 verloren. Trainer **Edo Oltmanns** was mit sien Mannskupp toefree, gaff aber toe, dat Auerk dat Spöl verdeent wunnen harr.

So, toe d' Schluss noch as alltied 'n kört Foetballwitz, dit Maal vör mien Bekannte **Heike 04** ut Borssum:

De Frauenbeupdraagte van de Diiütske Bundesdag stüürt 'n Rundschrieven an all Foetball-Bundesligavereenen un deit dorum beden, dat egen Stadion doch ennelk maal na 'n Frau toe noehmen.

De eentigste Vereen, de süük meldt, is Schalke 04. De Schalker Präsident deelt per Telefon de Frau in Berlin an 't Telefon stolt mit, dat he süük entsloten hett, hör Wünsk toe erfüllen. De Frau freit süük as 'n Klütje un fraggt: „Wo sall dat Stadion dann in Toekummst heten?“

„Dem-Ernst-Kuzorra-seine-Frau-Stadion!“

So leev Toehörers van Radio Oostfreesland,

ik hoop, Joe hett dat Plattdütsk gefallen, denn mien Motto heet ja alltied,

plattdütsk dürt – un dat passt an disse Dönnerdag heel besünners - nettso as Kickers Emden – neet unnergahn.

Bit anner Maal

Joe

Erich Bolinius ut Emden-Petjem.